

**प्रसार भारती**  
प्रादेशिक समाचार एकांश  
आकाशवाणी रायपुर (छत्तीसगढ़)  
प्रादेशिक समाचार बुलेटिन  
(छत्तीसगढ़ी)

18.00 रविवार

दिनांक 25.06.2017

\*\*\*\*\*

**मन की बात-01**

प्रधानमंत्री नरेन्द्र मोदी ह देसवासी मन ले अपन उत्पाद अउ सेवा ल सरकार तीर बेचे बर गर्वमेंट ई-मोर्केट प्लेस जी-ई एम पोर्टल ल बउरे बर किहीन हे। आकाशवाणी ले **मन की बात** कारीकरम म बोलत श्री मोदी ह किहीन कि ए पोर्टल ह न्यूनतम सरकार-अधिकतम प्रशासन के एक टिन सुधर रूप हरय। एला कम कीमत ले जादा सहूलियत अउ सुधर काम राखे बर बनाय गेहे। प्रधानमंत्री ह तमिलनाडु म मदुरै के एक झिन नारी-परानी अरुलमोझी सर्वनन के जिकर करत बतईन कि उनला अपन कारोबार सुरू करे बर मुद्रा योजना के चलत पइसा मिले हावय।

हाले म संपन्न अंतर्राष्ट्रीय योग दिवस बारे म बतावत श्री मोदी ह किहीन कि योग ह जम्मां विश्व जोड़े के सुधर जरिया बनीस हे। सिंगापुर अइसन नान्हे देस म घलो सत्तर टिन ठउर म योग के कारीकरम राखके हफता भर ले एखर अभियान चलाय गीस। ओमन बतईन कि योग ले समाज ह स्वास्थ्य बर सावचेत होय हे। अंतरिक्ष विज्ञान म देस के सुधर बड़का उपलब्धि के उल्लेख करत प्रधानमंत्री मोदी ह किहीन कि ए ह भारत के पहिचान हरय, ओमन बतईन कि भारत ह अंतरिक्ष म घलो अपन झंडा फहरावत हे। दू दिन पहिलीच इसरो के कार्टोसेट-दू श्रृंखला के उपग्रह के संग तीन टिन नैनो उपग्रह के प्रक्षेपण बारे म बतावत प्रधानमंत्री ह किहीन कि एखर ले खेती-बाड़ी अउ अलकरहा आपदा ले निपटे म मदद मिलही।

**मन की बात-02**

प्रधानमंत्री ह लोकतंत्र ल मजबूत राखे उपर बल देवत किहीन कि ए ह हमर चिन्हारी हावय। संगे ए बारे म प्रकाश त्रिपाठी ले मिले पाती उपर गोठियाईन, जेमा ओमन ह पच्चीस जून उन्नीस सौ पचहत्तर म लगाय गे आपातकाल यानि इमरजेंसी ल एक टिन करिया बेरा बताय हे।

श्री मोदी ह किहीन कि लोकतंत्र बर सरलग सचेत रहना जरूरी हे। संगे ओमन किहीन कि पहुना ल गुलदस्ता के जघा पुस्तक या फेर रूमाल ले जोहारे। ओमन किहीन कि खादी के रूमाल बउरे ले ग्रामोद्योग ले जुड़े मनखे मन ल मदद मिलही।

भगवान जगन्नाथ के रथ यात्रा अउ ईद-उल-फितर के मउका म देसवासी मन ल बधई अउ सुभकामना देवत प्रधानमंत्री ह किहीन कि भारत के विविधता ह इहां के सक्ति हरय।

## माओवादी-वारदात-01

बीजापुर जिला म पाछु बारा घंटा के दउरान माओवादी के हमला म एक झिन सब इंस्पेक्टर समेत तीन झिन सुरक्षाकर्मी घायल हगे।

जिला म माओवादी मनके खिलाफ अभियान चलाय जात हे। जेखर चलत गंगालूर थाना क्षेत्र ले डिस्ट्रिक्ट रिजर्व ग्रुप-डीआरजी के एक ठिन टुकड़ी ल मुनगा सोज पठोय गे रिहीस। ए दल ह सर्चिंग बाद जब वापिस लहुटत रिहीस। तभे घात लगाय माओवादी मन जवान मन उपर हमला कर दीस। जेखर ले सब इंस्पेक्टर अरुण मरकाम घायल हगे। उंखर बाया पांव गोली लगे हावय। घायल एस.आई ले तुरते बीजापुर अस्पताल लाय गीस। जिहां उंखर हालत खतरा ले बाहिर बताय जात हे।

इही बीच, बीजापुर जिला म सीआरपीएफ के कोबरा बटालियन के दू झिन जवान माओवादी उहार ले लगाय गे बारूदी सुरंग के चपेट म आय ले गंभीर रूप ले घायल हगे हे। पहिली माओवादी मन विस्फोट करीन तेखर पाछु गोलीबारी घलो करीन। ए घटना तररेम इलाका के हरय। जिहां ए जवान मन तीन दिन तक ले बासागुड़ा थाना क्षेत्र म चले ऑपरेशन बाद लहुटत रिहीन। फेर ये दूनो घायल जवान ल इलाज खातिर हेलीकॉप्टर ले रईपुर लाय गेहे।

ओति, काली सुकमा जिला के तोंडामरका म होय मुठभेड़ बाद सहीद जवान मनके संख्या बाढ़के तीन हगे हे। पाछु रतिहा घटना म गंभीर रूप ले घायल दू झिन जवान म ले ए झन के परान छुट गे। जेखर नाव राजेश कोरमा रिहीस। उहें, ए मुठभेड़ म डीआरजी के कट्टम्म राजकुमार अउ सुनम मनीष सहीद हगे रिहीस। कट्टम्म राजकुमार ह सुकमा जिला के एर्राबोर के कोगड़ागांव के रहइवया रिहीन। उहें, सुनम मनीष ह दोरनापाल के बोदीगुड़ा के अउ राजेश कोरमा ह कांकेर जिला के रहइवया रिहीन।

## माओवादी-वारदात-02

इही बीच, दंतेवाड़ा जिला म पुलिस ह एक ठिन नक्सली कैम्प ल ध्वस्त कर दीस। ए कैम्प ह गंगालूर थाना क्षेत्र के डोडी तुमनार म रिहीस। इहां ले पांच ठिन ग्रेनेट के संगे अब्बड़ अकन आने जिनीस मिले हावय। ए कार्रवाई ल एसटीएफ अउ डीआरजी के जवान मन अंजाम दे हावय।

ओति,. कांकेर जिला म सुरक्षा बल मन ह एक झिन एरिया कमांडर समेत दू झिन माओवादी मन ल बांदे इलाका ले गिरफ्तार करे हावय। ए कार्रवाई बीएसएफ अउ जिला पुलिस के संघरा टीम ह करे हे।

ओति,. कांकेर जिला म पुलिस अउ बीएसएफ के संघरा टीम ह बांदे थाना जघा म गश्ती बेरा माड़-पंखाजूर रद्दा ले दू ठिन बम बरामद करे हे।

इही भीतरी,. काली सुकमा जिला के तोंडामरका इलाका म जे माओवादी के लास मिले रिहीस, ओखर चिन्हारी सेक्सन कमांडर कोरसा महेश के रूप म होय हे।  
ऐति, बीजापुर जिला म रद्दा बनाय के काम के बेरा सुरक्षा खातिर तैनात सीएएफ के एक झिन जवान ह खुदे ल गोली मारके आत्महत्या करे के परयास करे हावय।

## रथयात्रा

भगवान जगन्नाथ के रथयात्रा के परब आज छत्तीसगढ़ म घलो भारी उत्साह के संग मनाय जात हे। बिहनियाच ले मंदिर मन म श्रद्धालु मनके भारी भीड़ हावय अउ दिनभर पूजा-पाठ चलत हे। ए बेरा भगवान जगन्नाथ,. बलदाउ अउ देवी सुभद्रा ल आने-आने रथ मन म बइठा के यात्रा निकाले गीस।

रायपुर के गायत्री नगर के जगन्नाथ मंदिर म आज बिहनिया राज्यपाल बलरामजी दास टंडन अउ मुख्यमंत्री डॉक्टर रमन सिंह पूजापाठ के संगे रथयात्रा म सामिल होईन, जेमा मुख्यमंत्री ह विधि-विधान के संग भगवान के रथ रेंगे के रद्दा म सोनहा बाहरी ले बाहर के छेरा-पहरा के रस्म पूरा करीन। ए दउरान अब्बड़ श्रद्धालु मौजूद रिहीन।

प्रदेस के आने जिला म घलो आज भगवान जगन्नाथ के यात्रा निकाले जाय के समाचार मिले हावय।

\*\*\*\*\*